

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-03602-2018
Broj akta: 01EN-001
Gračanica, 31.10.2018.. godine

Z A P I S N I K
SA 22. SJEDNICE OPĆINSKOG VIJEĆA GRAČANICA

Održane dana 26. 09. 2018. godine u sali za sjednice nove zgrade Općine Gračanica sa početkom u 10,00 sati.

Početu sjednice prisutno je bilo 26 članova Općinskog vijeća Gračanica.

Odsutni su bili: Dedić Dino, Bajrić Vahid, Dizdarević Kemal i Hadžić Mirsad.

Sjednicom je predsjedavao Nihad Krajinović, Predsjedavajući Vijeća, zajedno sa zamjenikom Almedinom Devedžićem i sekretarom Dženanom Tukulj.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća sjednici su prisustvovali: Općinski načelnik, Općinski pravobranilac, šefovi Službi za upravu, izvjestioci po pojedinim tačkama dnevnog reda, Razija Junuzović, Begović Jasminka i Nejra Naimkadić, članica Etičke komisije Asja Salkić, te predstavnici sredstava informisanja.

Zapisnik sa 21. Sjednice Općinskog vijeća Gračanica usvojen je jednoglasno sa 26 glasova „ZA“.

Predsjedavajući Vijeća je upoznao članove Vijeća da se Kolegij Općinskog vijeća dogovorio da na ovoj sjednici, s obzirom na predizborne aktivnosti, neće biti korišten sat vremena predviđen za kandidovanje vijećničkih pitanja i inicijativa, a s tim će se nastaviti od naredne sjednice.

Prešlo se na raspravu o predloženom dnevnom redu koji glasi:

1. RAZMATRANJE I USVAJANJE ODLUKE O PRODUŽAVANJU PERIODA PROVOĐENJA LOKALNOG AKCIONOG PLANA ZAŠTITE ŽIVOTNE SREDINE OPĆINE GRAČANICA.
2. RAZMATRANJE I USVAJANJE IZVJEŠTAJA O REALIZACIJI LOKALNOG AKCIONOG PLANA ZAŠTITE ŽIVOTNE SREDINE OPĆINE GRAČANICA (LEAP) ZA 2017. GODINU.

3. RAZMATRANJE I USVAJANJE IZVJEŠTAJA O REALIZACIJI PLANA KAPITALNIH INVESTICIJA ZA 2017.GODINU.
4. RAZMATRANJE I USVAJANJE IZVJEŠTAJA O REALIZACIJI MEG PROJEKTA.
5. RAZMATRANJE INFORMACIJE O REALIZACIJI PROJEKTA VODOVODNE I KANALIZACIONE MREŽE IZ SREDSTAVA KREDITA EIB.
6. RAZMATRANJE INFORMACIJE O STARIM I IZNEMOGLIM LICIMA U STANJU SOCIJALNE POTREBE NA PODRUČJU OPĆINE GRAČANICA.

Učesnik u raspravi o dnevnom redu je Šehić Edin:

„Ne znam da li se može smatrati ovo vezano za raspravu za dnevni red. Obzirom da smo usvojili novi Poslovnik o radu, gdje je predviđeno da imamo vijećnička pitanja na sjednicama, ja moram lično izraziti nezadovoljstvo što nisu dozvolili na ovoj sjednici, bez obzira na sve aktivnosti, da se raspravlja o vijećničkim inicijativama i pitanjima. I zaista mi je evo i žao i krivo što ste to usvojili na Kolegiju. I samim tim mi kao vijećnici kršimo Poslovnik kojeg smo nedavno usvojili“.

Zaključena je rasprava i dnevni red predložen za 22. Sjednicu usvojen je jednoglasno sa 27 glasova „ZA“ jer je sjednici pristupio i Hadžić Mirsad.

Sjednica je nastavljena odmah.

TAČKA 1

RAZMATRANJE I USVAJANJE ODLUKE O PRODUŽAVANJU PERIODA PROVOĐENJA LOKALNOG AKCIONOG PLANA ZAŠTITE ŽIVOTNE SREDINE OPĆINE GRAČANICA

Nije bilo učesnika u diskusiji i Odluka o produžavanju perioda provođenja lokalnog akcionog plana zaštite životne sredine općine Gračanica je usvojena jednoglasno.

TAČKA 2

RAZMATRANJE I USVAJANJE IZVJEŠTAJA O REALIZACIJI LOKALNOG AKCIONOG PLANA ZAŠTITE ŽIVOTNE SREDINE OPĆINE GRAČANICA (LEAP) ZA 2017. GODINU

Nije bilo učesnika u diskusiji i Izvještaj o realizaciji lokalnog akcionog plana zaštite životne sredine općine Gračanica (LEAP) za 2017.godinu je usvojen jednoglasno.

TAČKA 3

RAZMATRANJE I USVAJANJE IZVJEŠTAJA O REALIZACIJI PLANA KAPITALNIH INVESTICIJA ZA 2017.GODINU

Učesnici u diskusiji po ovoj tački dnevnog reda su:

Šehić Edin:

„Izvještaj kao izvještaj je sasvim korektan i dobro urađen, ali obzirom da je tačka Plan kapitalnih investicija, to jeste realizacija u 2017.godini, na neki način, jedna inicijativa vezano za nacrt budžeta, obzirom da u MZ-a je bio novi saziv Vijeća MZ-a i građani vjerovatno podnošenjem određenih planova odnosno za Plan kapitalnih investicija i nekih projekata sigurno nisu u toku, šta je i ušlo u dosadašnji Plan kapitalnih investicija za dugoročni period. Predlažem dakle i službi i načelniku da uputi MZ-a putem Službe za finansije prikaz nacrta budžeta da se izjasne prije svega ono što je po Planu kapitalnih za svaku mjesnu zajednicu predviđeno za 2019.godinu da se pošalje, kako bi se izjasnili da li su im to prioritetni projekti ili eventualno neki drugi koji su im predviđeni po Planu kapitalnih investicija jer stvarno na terenu se mijenja i mislim da bi bilo korektno da sve mjesne zajednice, vijeća mjesnih zajednica, koriguju odnosno ažuriraju šta im je prioritetno recimo dvije-tri godine da rješavaju ali to mogu riješiti u narednoj godini“.

Džebo Senahid:

„Izvještaj je dobar, samo me interesuje jedna stvar, a ovdje je prisutna i Razija Junuzović. Na strani 24 zadnja tabela koja se nalazi i sad imamo planirano, ne znam ostvareno sve i ovamo stoji da su čini mi se sredstva građana 18.000 KM, da li je to greška, da li je to stvarno stanje? Samo me to zanima, ništa više“

Odgovor je dala Razija Junuzović.

Sjednici je pristupio i Dizdarević Kemal pa je prisutno 28 članova Vijeća.

Izvještaj o realizaciji Plana kapitalnih investicija za 2017.godinu je usvojen jednoglasno sa 28 glasova „ZA“.

TAČKA 4

RAZMATRANJE I USVAJANJE IZVJEŠTAJA O REALIZACIJI MEG PROJEKTA

Nije bilo učesnika u diskusiji i Izvještaj i realizaciji MEG Projekta je usvojen jednoglasno sa 28 glasova „ZA“.

TAČKA 5

RAZMATRANJE INFORMACIJE O REALIZACIJI PROJEKTA VODOVODNE I KANALIZACIONE MREŽE IZ SREDSTAVA KREDITA EIB

Učesnici u diskusiji po ovoj tački dnevnog reda su:

Hasić Ibrahim:

„Ja bih vezano o ovom Izvještaju postavio nekoliko pitanja iako sam ubijeđen da drugarica neće znati ovo ni objasniti jer bi mnoga pojašnjenja trebao dati direktor ovog projekta. Pa kaže ovako, teneder I usluge komponente dva i tri 260.000 EUR-a okončana geološko-hidrološka istraživanja - radovi na istražnim bušotinama. Dobro, istražne bušotine su provedene. Znamo, tamo gdje ima vode, ima opravdanosti da se ide u eksploataciono bušenje. Tamo gdje nema vode, logično je da se tamo ne troše pare. Ja neću okolo ići nigdje, ja ću ići direktno. U Malešićima, gdje je nula, zarez nula litara kroz jednu sekundu nađeno vode u istražnoj bušotini u Malešićima. To odgovorno tvrdim, jer sam bio i na početku i svaki drugi dan i na zatvaranju istražne bušotine, koju su radili Makedonci. Znači, takvo je stanje vode

bilo. Međutim, tu je rađena eksploataciona bušotina. Ja sam postavljao pitanja u jednoj verziji i direktoru što nisam znao, da je on direktor projekta, pa je odgovorio da on sa tim nema ništa. Ne znam ja vas je mijenjala gospođa Džana, pa sam i od nje dobio nešto, ništa ni s čim. Pa sam na kraju pristupio informacijama i tu sam dobio na određen način pravo stanje nekako. Naravno, nisam zadovoljan i niko nije objasnio zašto je vršena eksploataciona bušotina na bušotini u Malešićima i zašto je potrošeno toliko para koliko je potrošeno. Ako bogda na narednoj sjednici imat ću ja pitanje upućeno direktoru projekta, a njegovo se važi, nakon istražne bušotine hoće li se ići dalje ili se neće ići dalje. Pošto nema vode, naravno da se ne ide i da se pare ne bacaju. U tom slučaju su na bušotini u Malešićima bačene pare u eksploataciono bušenje. O tom po tom, vrijeme je pred nama. Ne morate mi davati odgovor, ja samo hoću da konstatujem, da je to tako. Ne možete mi dati ništa novo, ja već imam to što bi ste vi meni rekli“.

Senahid Džebo:

Ja bih samo da iskoristim priliku dok je tu nadležna služba i da priupitam. U ovom izvještaju, ustvari svi mi znamo kako je rađena ova postrojenja prečišćavanja pitkih voda što se tiče MZ Stjepan Polje. Svi znamo koliko je to izvorište i to nam je potvrdio i direktor Vodovoda, koliko litara vode u sekundi ima i evo ovdje je navedeno da će se nastaviti raditi u skladu sa crvenom knjigom. Realizacija ide, čini mi se Vrela-Soko. Pitam dokle se stiglo sa prečistačem u Stjepan Polju, da li će se nastaviti tender? Obzirom da mi imamo već urađen jedan projekat za te stvari, koji je daleko jeftiniji od ovoga, kojeg smo radili tamo i koji bi direktno na bazenu bio rađen i možemo vam to dostaviti“.

Vahidin Smajlović:

„Ja lično kao građanin koji je iz MZ u kojoj nije baš riješeno pitanje vode, podržavam sve aktivnosti općinske vlasti u rješavanju ovoga u cilju bolje snabdjevenosti vodom. Smatram to kao jedno od prioritetnih i ključnih pitanja na kojem mi treba da radimo i kao Općinsko vijeće a i Općina Gračanica, da stavljamo to kao prioritet i da zaista to uradimo. Ovo je pitanje svih pitanja i moramo na sve načine da se na tome angažujemo. Jasno je meni da su ti ogromna sredstva i da treba doći do kredita i tih velikih sredstava ali zaista moramo voditi računa o tome, da u što kraćem periodu rješavamo i sve MZ. Znači ova ruralna područja općine sa kvalitetnom vodom. Ovdje, mene lično interesuje tender 11 čini i se, koji je nastavak ovih, istražnih bušotina. Evo mi u Škahovici smo upoznati, na žalost nismo imali sreće kad je to rađeno da je dala rezultat, pa se pitamo šta će se raditi dalje? Hoćemo li mi inicirati da se ponovo to radi ili ćemo čekati malo duži period. Znači damo da se odgovor da vezano za nastavak istražnih bušotina“.

Šehić Edin:

„Evo obzirom da je na predhodnoj sjednici moje pitanje bilo rješavanje vodosnabdjevanja MZ Lendići, za što sam dobio prilično diplomatski odgovor od JP „Vodovoda i kanalizacije“. Ako bude, bit će ono šablonski rečeno. Interesuje me šta je jer je nabrojana. Općina Gračanica je klacificirala ulaganje za vodosnabdjevanja kao hitno između ostalog na količine 50 litara u sekundi pitke vode, prečišćavanje pitke vode itd. Da li je u tim svim hitnostima planirana MZ Lendići. Evo ima i Škahovica a i druge MZ koje s tim imaju problema, pa da se nadovežem samo i pitam da li je MZ Lendići planirana da se rješava? “

Odgovore na postavljena pitanja dala je Nejra Naimkadić:

„Evo ja ću direktno odgovoriti na pitanja koja su mi upućena. Ja se moram referirati na pitanje gospodina Ibrahima Hasića i da kažem da se u okviru ovog projekta nikada nije radila eksploataciona bušotina. Radila se još jedna dodatna istražna bušotina. Samo to mogu reći i

iza toga čvrsto stojim jer sam šef čitavog ovog projekta i vrlo dobro moram znati, šta se radi preko nadzornog organa. Ako je rađena eksploataciona onda se nešto krivo radilo i prošlo po zlu. Što se tiče Stjepan Polja, svi ste upoznati, na prošloj sjednici kad je Vijeće informisano, vezano za projekat VACAN, raspisali smo po žutoj knjizi onako kako smo potpisali sa EIB-om, da ide ključ u ruke, projektovanje plus izgradnja. Bilo je planirano da se uradi Vrelo Ilidža u Sokolu i da se uradi u Stjepan Polju. Stjepan Polje kao jedno od najvećih, s tim da je u ovoj fazi planirano, prvo 5 litara u sekundi, a kasnije bi se proširivalo sve u skladu sa onim sredstvima kojima mi raspolažemo. Međutim, raspisali smo, komisija je odradila sve svoje a bio je predstavnik EIB-a. Nakon toga što smo uradili sve tehničko, otvara se finansijski dio. I svi smo bili zaprepašteni da je ponuda toliko velika, od 750.000 EUR-a planiranih došlo je na dva i po miliona EUR-a i sami znate da je to previše. Obzirom da je ovaj projekat bio planiran do 30 juna 2018. godine, a da smo mi u 2016. imali informaciju sa ovim postrojenjima za prečišćavanje pitke vode, onda smo se zapitali, da li mi uopšte možemo i da krenemo sad stići uraditi te sve projekte. Dobili smo odgovor i od donatora da ne možemo. Prije svega mi smo trebali identificirati šta mi to možemo uraditi. Onda smo zamolili da bar uradimo projektno-tehničku dokumentaciju na nivou glavnih projekata. To bi išlo po crvenoj knjizi FIDIK-a i da idemo lokalnom zakonu, što je puno jednostavnije. Procedure su kraće, uslovno rečeno, od onih kako oni propagiraju u Evropskoj investicijskoj banci. I predložili smo da to bude jedno postrojenje. Na osnovu analize koliko će koristiti i kolika su postrojenja, nama je ostalo da se uklopimo u iznos sredstava koja su nama ostala na raspolaganje. Ali imam i jednu radosnu vijest. Nisam ni ja kao šef projekta zadovoljna koliko smo ove godine uradili ali možete znati kako su se od 2012. godine do 2018. godine znatno povećale cijene, i materijala i svega drugog i sad na onu procjenu od 2011. godine do danas sve su cijene porasle tako da vrijednost ni u drugim komponentama nije radna. Uputili smo zahtjev i tražimo mogućnost da dobijemo grant sredstva i dobili smo odgovor od Federalnog ministarstva poljoprivrede, vodoprivrede i šumarstva, ima tu aplikaciju gdje su oni jedini kao Federalni nivo koji potpisuje sa EIB-om i dali su aplikaciju i to se zove institucionalni okvir za zapadni balkan i dali su aplikaciju gdje bi se uradila sva tri ova postrojenja, odnosno uradili projekti. Uradila bi se studija izvodljivosti jer se to i tiče jedino tehničke pomoći u izradi odgovarajućih projekata, karta i slično. Tako da ako bi dobili tu sredstva, čeka se prilično dugo odgovor, evo već šest mjeseci. I ako dobijemo tu sredstva usmjerit ćemo ih na komponente za koje nam fali sredstava. Tako da kažem sve karte su otvorene i mi nismo stali tako da ima mogućnost da uradimo tehničke elemente za ovo. Za Škahovicu mi je zaista žao. Urađena geološka i hidrogeološka istraživanja, tako se zove komponenta, u saradnji sa strukom ovlaštenom urađeni su projekti, utvrđene su tačne koordinate gdje bi eventualno moglo biti vode. Istražne bušotine su istražne bušotine i pokazale su da negdje vode ima, a negdje nema. Išlo se po analizama da će u Škahovici sigurno biti, a da recimo u Prijekom Brdu neće biti nikako vode. Zato se i zovu istražne bušotine i njih niko neće da finansira jer se nikad ne zna šta će biti proizvod. Daljna faza, ono što nas čeka u istražnim bušotinama ja sam napisala u izvještaju. Ono što su porasla sredstva i radova i materijala i roba, nama fali dodatnih sredstava da bi dodatno istražili bušotine. Sad u ovoj fazi mi možemo odmah ići na ispitivanje ovih bušotina koje su pokazale određene rezultate. Ali opet moramo u skladu sa zakonom izvršiti ispitivanja u toku jedne godine hidrogeološke godine i tek tad da vidimo kolika je stvarna eksploatacija odnosno kolika je potencija tog izvorišta i tek tad idemo u projektovanje. Tek tad možemo ući u radove eksploatacionih bušenja i crpljenja tih izvorišta. Takva je procedura. Za Lendiće, na žalost mi u ovoj fazi nismo. Mi smo postavili niz želja, postavili smo mi dosta. Kad se kaže dva i po miliona EUR-a je kredit, to su značajna sredstva ali kad krenete u implementaciju to su jako mala sredstva i na žalost nije se moglo sve uklopiti novo. I jednom sam već rekla da nismo samo mi koji rade selekciju projekata. Treba imati niz uslova i ispuniti ih koji to projekti mogu ući u ovu projektnu fazu. Lendići nisu na žalost nisu, što ne znači da neće biti uzeti u obzir u nekom drugom projektu“.

Hasić Ibrahim:

„Prije svega istražna bušotina kad se završi, sačini se jedan izvještaj o stanju istražne bušotine. Na žalost, na toj bušotini u Malešićima nema tog izvještaja, ali ću ja na slijedećoj sjednici pokazati jedan izvještaj kako on izgleda. Ja se slažem, vi jeste šef projekta ali niste direktor projekta. Direktor projekta, zna se ko je i direktor projekta. Direktor projekta, zna se ko je i direktor projekta je trebao i biti to i da pod njegovom ingerencijom se radi ili ne radi. Ja hoću da kažem da je to i rađeno pod njegovom ingerencijom i hoću da vam kažem da je u Malešićima rađena eksploataciona bušotina i zacijevljena, draga gospođo“.

Zaključena je rasprava, a u skladu sa odredbama Poslovnika Vijeće se ne izjašnjava o informacijama.

Data je pauza u trajanju od deset minuta, a nakon tog nastavilo se raditi po dnevnom redu.

TAČKA 6

RAZMATRANJE INFORMACIJE O STARIM I IZNEMOGLIM LICIMA U STANJU SOCIJALNE POTREBE NA PODRUČJU OPĆINE GRAČANICA

Uvodno obrazloženje je dala Jasminka Begović, direktorica JU „Centar za socijalni rad“ Gračanica:

„Jako kratko samo da se osvrnem na ovu temu o starim licima i da navedem da je prema posljednjim podacima Federalnog zavoda za statistiku, na općini Gračanica ima 6.812 starih lica. Od tog broja vidjeli ste koliko ih je obuhvaćeno sistemom socijalne zaštite i prava. Među ovim starim licima koje smo naveli u izvještaju, najviše ugrožena kategorija jesu upravo lica stalne novčane pomoći. To su stara lica koja nemaju primanja, a ni srodnika, nisu se ženili ni udavali ili su ostali bez srodnika, koji su izgubili život na razne načine. Ili su to lica koja imaju srodnike ali po zakonu nemaju obavezu zato što njih imovinski cenzus ne omogućuje brigu o njima. Korisnici stalne novčane pomoći a njih je 65 sa današnjim danom u Centru za socijalni rad. Znači, oni imaju pravo i na subvenciju za električnu energiju, premiju osiguranja i slično kao i pravo na zdravstveno osiguranje. Imaju mogućnost da tokom godine ostvare pravo i na jednokratne pomoći u zavisnosti od stanja te potrebe. Blizu 400 ima lica koja ostvaruju prava po Federalnom zakonu, a to su ona lica kojima je priznato pravo na tuđu pomoć i njegu. To su bolesna stara lica, teškog stanja nepokretna i slijepa lica i lica oboljela od demencije. Normalno da je ta naknada koja je od 400,00 KM, nije dovoljna za potrebe tog lica. To su lica koja su 100 % nesposobna. Preko 400 lica ima koja ostvaruju prava jer imaju preko 65 godina i nisu osigurana. Ima ih i više sigurno. Jednokratna pomoć se može ostvariti tri puta u godini. Mnogo širi domet Centra je po pravu porodično pravne zaštite. U tome veliku podršku imamo iz MZ-a odnosno predstavnika MZ-a. U tome nam pomažu svakako i građani koji pronalaze ta lica. Kako bi se sprečilo ugrožavanje života tih lica. Ima lica koja su ostavljena od srodnika koji su iskoristili njihovu imovinu i otuđili je. Na kraju, svjesni smo i vidjeli ste u informacijama tu je negdje oko hiljadu korisnika iz doma socijalne zaštite. Osim ovih ima i hiljadu i više onih kojima se radi porodično pravna zaštita. Svjesni smo svaki dom da ima više i da ima potrebe za više i novčanih naknada. Saradnja sa nevladinim centrom, je veća, ali je nedovoljno jer, je veća, ali je nedovoljno jer je mnogo više lica kojima je pomoć potrebna. U zaštitu starih lica svi se trebamo uključiti“.

Učesnici u diskusiji su:

Edin Ibrišević:

„Prije svega iskoristio bih priliku kao i svaki put da pohvalim rad Centra za socijalni rad, kao i rad direktora ove ustanove. S obzirom da sam u više navrata, zajedno ovdje i sa

drugim kolegama, podnosio inicijativu kada je u pitanju, da kažem pokretanje novih institucija, odnosno doma za stara i iznemogla lica. Ukoliko direktorica ima saznanje ili neko drugi volio bih da znam, pošto pričaju i o nekom javnom privatnom partnerstvu kada je to u pitanju, pa i privatnoj izgradnji takve jedne ustanove. A evidentno je da nam treba, u izvještaju vidimo da koristimo usluge centra Duje. Duje naravno nisu za sve, to je uglavnom za bolesne osobe. Taj smještaj tamo da kažem nije prilagođen dobro držećim starim osobama i licima i koje bi imale potrebe za jednom takvom ustanovom. Samo u tom dijelu me interesuje da li ima nekih saznanja i da li će u dogledno vrijeme biti prilike da se to realizuje i kod nas u Gračanici. Stvarno je potreba, na žalost vidimo da je sve više nacija starih, a sve manje mladih“.

Vahidin Smajlović:

„Evo ja bih rekao da je težak i zaista odgovoran posao kojeg radi Centar za socijalni rad, s obzirom da evo svjedoci smo da se sve veći broj lica u toj dobi nalazi u teškom materijalnom i finansijskom stanju. To iziskuje veliki angažman uposlenika u stvaranju što boljih uslova ovim starim licima kojih je svakim danom sve više, a i njihovih potreba. Na žalost sredstava nema dovoljno, a zahtjevi su sve veći i veći. Upravo zbog toga čestitam uposlenicima JU „Centar za socijalni rad“, na svemu ovom što rade vezano za pomoć starim licima, kao i ostalim koji su uključeni u to, Crveni križ, Merhamet kao i Centru Duje i svim privrednim subjektima, pojedincima, organizacijama koje na bilo koji način pokušavaju i pomažu zbrinjavanje starih lica. Dovoljno je ova rečenica na početku izvještaja koja kaže, a ustvari to je i činjenica, starenje počinje odmah nakon rođenja. To je tačno i zaista treba da svi vodimo o tome računa. Svjestan sam ja da sredstava nema dovoljno, ali pomoć je i u pokretanju inicijativa, za izgradnju doma za stare, svakako vjerujem da bi to dalo efekat i da u tom pravcu treba da idemo. Evo još jedanput, zahvaljujem se na podacima koje je iznijela direktorica, a i iz izvještaja odnosno informacije imamo dobar pregled kakvo nam je stanje po tom pitanju na općini Gračanica“.

Rahim Gadžić:

„Ja sam izašao, prije svega da se zahvalim direktorici na informaciji o dobroj saradnji sa MZ-a. Ja mislim da ne postoji ni jedan predsjednik MZ koji je uputio zahtjev direktorici, da nije adekvatno odgovorila i pomogla u skladu sa mogućnostima koje ona može da uradi. Ujedno da joj čestitam na reizboru direktora centra i nadam se da će te i nastaviti raditi u tom pravcu i pomagati ljudima koji su socijalno ugroženi na području općine Gračanica. Kad je u pitanju Centar Duje, bio sam u službenoj posjeti Centru i vidio da tamo ima i novi kompleks koji se radi, a u pitanju su apartmanska mjesta, gdje će moći se smjestiti osobe koje žele. Imaju u sklopu sobe i kupaonicu što su sve bolji uslovi odnosno uslovi su apartmanski. Vjerovatno će to nekom biti skupo, ali gradi se i oni se trude i razvijaju i ja im zahvaljujem na pomoći koju pružaju u saradnji sa Centrom za socijalni rad jer omogućuju bolje uslove za stare iznemogle osobe“.

Kratko se Jasminka Begović, direktorica JU „Centar za socijalni rad“ obratila i zahvalila se na čestitkama upućenim od strane vijećnika.

Vijeće se nije izjašnjavalo o Informaciji.

Na kraju sjednice Vijeću i prisutnim se obratio Općinski načelnik Nusret Helić, kao i Predsjedavajući Vijeća Nihad Krajinović.

Općinski načelnik Nusret Helić:

„Izrazio sam želju da kažem par riječi kao načelnik. Ovdje je puno vijećnika i normalno ulazite u izborni proces i preuzimate aktivnosti u vezi s tim. Ja sa stanovišta načelnika hoću da se zahvalim na dosadašnjoj korektnoj kompaniji koju vode političke partije koje imaju vijećnike u Općinskom vijeću. Želim i nadam se da će to ostati do kraja, prije svega zbog građana Gračanice, da pokažemo da smo mi jedna zdrava sredina, a postaje uskoro i grad. Dakle, očekujemo zaista da i u narednom periodu ovako vodite kompaniju i građani da odluče o programima o osobama koje su na listama i da poslije izbora svi budemo zadovoljni. Svima želim uspjeh na izborima. Evo toliko sam smatrao za potrebu da kažem“.

Isto to je zaželio i Predsjedavajući Općinskog vijeća.

Sjednica je završena u 11,20 sati.

ZAPISNIK VODILA
Mevlida Naimkadić

PREDSJEDAVAJUĆI
OPĆINSKOG VIJEĆA

Nihad Krajinović